

清河縣志卷之四

藝文

清河昔爲郡國自漢以來人文蔚起濟濟稱盛然年湮代遠著作無存斷簡殘編搜羅不遺文獻不足徵亦是邦士大夫之一憾也爰就見聞所及者略舉之以俟後之考證云爾

魏阮武撰正論五卷

魏張揖解司馬相如傳一卷

見漢書

晉清河太守陸雲集十二卷

唐劉輝慙甘陵賦一篇明山袁滋謂是賦褒善斥惡反春

秋旨然其文不可廢爲著後序

唐宋若莘著女論語十篇女弟若昭又爲傳釋之

齊王昕文集

梁張暉天文錄三十卷梁天監間受詔集古天官及圖緯
舊說爲之

唐張固撰幽閒鼓吹二十五篇

後梁崔居儉撰崔氏家禮

宋李祐之集三十卷

宋丁度撰備邊要覽

慶曆兵錄

瞻邊錄

邇英聖賢

龜鑑精義

元學士元明善文集三卷御史馬祖常撰神道碑末敘其
集有賦五詩一百六十三銘贊傳記五十九序三十雜著
十五碑志一百三十出入秦漢之間本之於六經以涵泳
其膏澤參之於諸子百家以騁其才辨刻而不見其跡新
而必自己出蔚乎其華敷鏗乎其聲古倡古學於當世爲
一代之文宗者聊城姚燧暨公而已信乎其必傳也銘曰
於維公文並古立大沛厥辭世莫及震聳聳贖力不克蜚
聲天衢名藹藹位臻公卿發軔跡蘊而不施用弗極閭中
肆外真力充天藻綺縟琢圭璧五十四年返元宅臨川吳
澈又爲序畧曰復初自少負才氣蓋其得於天者異於夫

而又浸淫乎羣經蒐獵乎百家以資益其學問增廣其識類不與人同既而仕乎內外應天下之物接天下之人其所資益增廣者又不特紙上之陳言故其文脫去時流畦徑而能盡古作者之道正矣而非易竒矣而非艱明而非淺深而非晦不狂亦不萎不俚亦不靡也登昌黎韓子之堂者不於斯人而有望與

清河縣張府君墓石

唐刺史

柳宗元

河東人

貞元二十年六月一日清河張公諱會寢疾卽世於莫亭
碧深里之私第享年七十六自屬纊至於移窆朋從親暱
洎州里士君子無不慟怛嗚呼仁賢之云亡也哉惟公受
自軒黃而分歷代茂盛源流益別公卽清河之緒會祖皇
太子諮議郎諱崇祖皇中府折衝諱操父皇太子內直郎
諱禮公卽內直郎嗣也早歲有節克壯一心拳拳禮容執
德無倦逮夫弱冠遵道兼義汪汪然不可得而親不可得
而友挺出常度機畧內蘊時薊州刺史御史中丞榮公籍
公嘉公之才曷以從事情以道契三揖而進受靜塞軍營

田判官恭儉涖職勲績明著甄錄奏聞受遊擊將軍守右
領軍衛幽州開福府折衝都尉員外置同正員賜騎都尉
公疏勢賊諂心不苟合澹泊爲頤年之用視簪組爲伐性
之具遂辭名晦迹高卧雲物因家於三河邑背郭而東得
林巒之勝致也暨乎年逾不惑以長子瓊佐鄭亭侯嘉聲
洋洋多歷年數由是閱實觀政巾車以來郡邑清暢禮容
大備旣釋我願斯不返駕守真空微妙之性會紛紜繁隨
之旨浩浩方寸洞豁塵境不其至歟嗟乎大道無涯天命
有定雖聖明不能越常運而超物外哉公以疾起無妄情
不嗜藥坦蕩居易悔咎莫有星歲幾周大漸長往嗚呼天

富其道而關於壽謂之何哉夫人北平田氏哀而得禮有子二人瓊等卜耐先塋龜筮告吉以其年十一月一日窆於任邱東北長邱鄉原禮也二嗣號擗痛深泣血哀告以先遠有請以誌之宗元承命不忤刻之貞石銘曰蘭茝其馨金玉其貞碎碎折之何神不明茂旌其英德立行成悠悠銘旌洋洋懿聲孝子令孫宅兆郊原龜筮叶從慶流後

昆

貝州平賀表

宋歐陽修

伏聞閏月一日攻下貝州殺到妖賊王則者盜孽竊與人
祇共瀆果憑睿算悉殄凶徒臣某伏惟皇帝陛下推仁育
物浸澤在人常服儉以躬行惟足兵而在念至於多損金
幣講好戎夷務體戰爭愛惜士卒德至深而莫報恩既厚
則生驕敢肆妖狂自干斧鉞驅憎土衆閉守城闕既違天
而逆人宜不攻而自破而况聖神運畧將相協忠不遺一
矢成就大戮悖慢者警而肅恪昏愚者知有誅夷銷沮姦
萌震揚威令臣幸忝和寄欣聞德音

文忠公
文集

--	--	--	--	--	--

定光佛墓碑記

宋吳浚

定光蔭覆沙界救度衆生發慈憫心示威神力其誰有功在乎覺皇矣爰自法身現滅靈骨斯存龍神尤切於護持人天得伸於供養歸心不退獲福無邊貝州隆興寺舍利塔者舊舊所傳云定光如來真身舍利接石記仁壽二年奉安於此先是兵亂閭闔失守遺基莫覩靈應尤多則有道者僧超一洞發真誠特興至願堅心苦力廢寢忘餐化導衆情僅二十載復有故府主侍中清河公光翰廣敷行業深植善根俾遂良緣共成勝事乃於本寺內建造飄塔一所共一十二級計甍一百三十尺塔之內又甃石棺一

所棺之內又造金棺銀槨并製金鑲瓶越以宋乾德五年
歲在丁卯四月八日丙寅年舍利五十二粒指骨一節於
其內以安置焉是日也雲屯士庶霧集生徒共結勝因咸
乞景福伏願慈雲廣蔭化日遐臨聖主當朝永播照蘇之
化勲臣佐國彌隆鎮撫之功人民獲保於康樂封域俾諧
於安靜壽山堅固業海蕩平空王之聖教大行開士之高
風不墜普天率土悉離樊籠異類羣生咸登正覺浚幼師
儒素長慕佛乘尙處迷津未達彼岸幸列參禪之職得諧
瞻禮之心爰以直書庶臻妙果故記

移學碑記

金翰林瑯琊 堪

清河在齊阜昌初爲河水墊溺因徙治厯亭而清河遂爲屬邑初郡庠居譙門之西暨遭水患齋宇蕩然水旣復固其基爲右司理旣及州徙又爲巡檢司凡三易訖爲主簿之公宇自學之廢距今幾四十年而生徒肄業之所歲時致敬之地闕然無所按每春秋釋奠則假令廳事會不若繙流羽徙居必置祖以嚴奉其所自出大定癸未歲十二月建安張公格來任是邑就舍之初詢其故惻然感發丞請於邑令劉公憲公忻然傾其意曰此惠之宿心君其成之乃舍以私錢二十萬助其費旣而酒監高君貞士進士

張伯達以及皇安止諸君樂聞其事一倡百和分務營新
吏民翕然唯恐其後於是鳩工度材卜縣之東南隅宋監
司公署之故基乃爲宣聖殿以嚴像設東西齋廡分焉碑
亭門宇煥然一新壯而不華儉而不隘經始於大定四年
三月落成於五年九月所用蓋二百萬然後莫諠者有所
絃誦者有歸

重修廟學記

元魏天章

學記曰君子知欲化民成俗其必由學乎是故古之王者建國君民教學爲先古之教黨有庠術有序國有學此之謂也然而學校則有廢有興風俗則有美有惡時世則有污有隆吾道則有顯有晦是以知學之興廢則俗從而美惡時之污隆則道從而晦顯然爲得其人則廢者可以興惡者可以美污者可以隆晦者可以顯苟不遇其人則廢而不能興惡而不能美污而不能隆晦而不能顯此古今之通論而百世不能易也夫清河縣者迹有由來自東漢時尊爲甘陵郡至唐改爲貝州歷宋及金爲恩美北近黃

河連年經滄遂徙州事於厯亭此邑止爲清河縣也今爲大名府之屬邑去府二百餘里孤城遠駕驛使往來爲治誠不易哉邑之宣聖廟始於金大定七年重創之後至今百有餘年矣自大元開國以來至於今日其間宰是邑者奚啻數十人而已知其爲政之先風化之原在於學校而能修廣黌舍增飭廟堂者夫何人哉達魯花赤伯縣尹邵氏名維禎主簿公孫氏重喜下車之始同詣文廟仰瞻吾夫子大成之殿板堂卑下廟宇蕞如側壁墮檐傾楹欹棟又見碑樓毀盡路門半摧慨然共有興復修起之志焉遂

於公庭諭諸同僚縣尉公蒙古氏入剌典史張公名國顯

暨邑之儒學教諭蒙古氏八都等協謀共議特擬改作爲
事上下官吏旨意合同一倡和罔不忻然遂及同心戮力
各出一年之俸給充工匠之資及邑之儒人丁允中張德
昭及張珪等并郡中士庶從而助者各有等差遂鳩工度
材選期興作達魯花赤伯縣尹邵公主簿公孫重喜親身
監督自朝至暮不遑暇食經始於至元三十一年之十月
落成於元貞月前後始終都無期月撤大成之殿舊貫板
堂單料順拱改爲西鋪之作蓋棟雕梁藻繪輪奐增廣崇
高方之舊宇六尺其階址砌用磨甌東西廊廡前後門樓
皆峙講堂旁齒兩序碑門創建路門重修廟堂廊廡齋室

門庭靡不完具煥然一新豈不偉歟時世之隆替風俗之
美惡職司牧者實任其責肇自今日上以致享於先師下
以講學於後輩每月朔望官僚士庶拜奠先聖先師於其
中春秋用牲幣釋奠於先聖先師之位前而致其敬焉俾
本邑黎庶一變禮義之風發揚素教崇重儒術使後之學
者有所依歸人材濟濟挾策決科早登仕路悉入王朝以
爲諸郡之倡者皆三公之力也功既成學者數輩求記於
予予不敢辭然鄙俚之言不足以發揚三公之善政姑撫
其實而錄焉如有入其門升其堂讀斯文者毋以文誚我
謹記至元三十二年立


重修儒學記

元 趙惟善

國家學校徧天下秦漢以來所未有也清河縣學始於金
大定間百有餘年國初亦嘗加葺歲月既久不無頽敝前
此官是邑者率以爲餘事而蔑不加意至正丙申二月達
魯花赤脫忽思帖木爾縣尹趙範葛義方主簿鄧克義相
繼下車謁聖廟視殿宇卑陋狹隘神弗克安顧學官桑彥
和議所以復之者於是監尹等各捐已俸計工不給邑士
王君永芳聞之慨然悉助以完經營於是年春三月逾月
而落成廟堂齋廡暈飛崇麗煥然一新邑人恐無以彰監
尹諸君之勞遂以學宮桑彥和狀來請文諸石若韓氏官

自天子至郡邑守長通得祿而徧天下者惟社稷與孔子然社祭土稷祭穀勾龍乃其佑享非其專主又其位所不屋而壇豈如孔子以王者禮巍然當座以門牆爲配自古常祀者無如孔子之盛故孟子所謂自生民以來未有如孔子者其賢過於堯舜至郡邑皆有孔子廟或不能修事雖設博士弟子或役於司名存而實亡惟茲清河則不然殿宇一新視學校爲尤甚若監尹可謂達爲政之本矣予嘗觀孟子論政曰謹庠序之教申之以孝悌之義則知先王所以建庠序之義以孝悌爲先人興於孝悌則萬善所從生人道之所由立譬如水有源木有根則其生無窮故

善觀人者必於人倫之際察之蓋人道莫大乎親親而孝悌者爲人之本也古之人自冬溫夏清昏定晨省以爲孝自徐行後長者以爲悌躬行是事默體是心充而達之不使私意側於其間則親親之理得無一物不在吾仁之中孝悌之道有不可勝用者矣是乃先王建學之本意而三君今日之所望於名士者莫先於此也是役也列簿贊其成文學董其役典史亦致力焉余樂是功德之及人也故不揆而爲之記至正十七年歲在丁酉吉日



學士元明善神道碑記

元馬祖常 中丞

有元古文之宗曰翰林學士清河元公以至治二年壬戌
二月七日薨於室其長子奉議大夫同知陝州路事晦又
死次子嵩七歲一女病而不嫁一孫尚乳也夫人李氏累
然抱其孫僦船歸清河織絳以君賓客僚隸皆四敬無一
頷之者獨其友主教大宗師吳全節謂馬祖常曰清河公
以文起家可謂貴顯光榮矣而其葬之後無碑以載其官
聞世次行事之實爾宜爲文余礱石以紀焉祖常曰嗟乎
子託蹟老氏而以禮義之事振吾徒哉謹按公諱明善字
復初資穎絕出讀書目所過即記諸經皆有師法尤深於

春秋弱冠遊吳中已名能文流轉江淮間浙東部使者薦之行省辟安豐建康兩學正行樞密院時董公士選僉院事敬之如賓不以曹屬御也董公遷江西行省左丞復羅致之省中會贛賊劉貴反擢左丞將兵討之擒賊三百人議緩誅誤得全活者百三十人將佐自宜多戮人及尸一切死者用張軍聲公固爭不可既又得賊盜書贛吉民下十萬左丞喜欲發之公乃置火焚之以滅跡二郡遂安未踰年登任任即樞密院照磨轉中書省左曹掾曹無留事坐誣免不辨僞高淮南文學益肆頃之坐誣事明復官左曹至大歲申我仁宗皇帝養德東朝選天下髦俊之士

公首被簡拔授承直郎太子文學仁宗卽皇帝位賜翰林待制承直郎兼國史院編修官與修成廟順廟實錄加奉議大夫是年升翰林直學士朝列大夫知制誥事修國史有詔命節書文擇其關政要者以進書成每奏讀一篇上必善之曰二帝三王之道非卿莫闡也太皇太后旣受尊號朝堂集議宜赦公曰數赦非善人福宥過可也乘傳出賑山東河南饑彭城下邳諸州民饑公以鈔萬二千定分給之民免死徙皇慶壬子修武宗實錄明年遷翰林侍講學士通奉大夫預議科舉服色延祐乙卯選充考官廷對又充讀卷官題筆詳定試卷甲乙每有著作得憲疾書他

打思者不及又詳開參訂孔氏宗法以五十四世孫思晦襲封衍聖公事上深嘉之參議中書省事毗贊良多知戊午貢舉復入翰林院侍讀學士通奉大夫歲申拜湖廣行省參知政事公過家上塚鄉之父老子弟迎謁勞問禮義周洽庚申英宗踐祚徵入爲集賢侍讀學士召至上都議廣廟制賜翰林學士資政大夫修仁廟實錄百官迎仁廟聖容有卿雲見承詔爲文以紀之賜酒嘉賞英宗親禱太室禮官進祝冊奏請署御名上命代署者三眷遇褒優近世無有也旣薨之三月歸葬於清河王家原之先塋泰定間得請於朝贈資政大夫河南江北等處中書省左丞追

封清河郡公諡文敏封三代享年五十有四

--	--	--	--	--	--

重修學宮碑記

雲衛

蔡菽述

清河爲廣平屬邑儒學分教劉蒙泉余游庠時會文也遣
价持狀來以某邑大夫山左傅公重修學宮屬余文紀其
事據來狀公諱廷耆號艾軒應歷賓薦甲子歲承上簡命
爲邑令下車甫三日入學宮謁殿宇慨其荒廢奮然欲拓
而新之謀於心誠於衆自於上官以力詘財殫未敢遽舉
亦未嘗輒置偶閱庫籍獲官生俸廩贏餘五百金卽忻然
相謂曰以此爲學修具大事濟矣遂申於司府以達臺院
報可又承臺檄別駕趙公詰計其材費會雞澤尹常公給
值於民之殷實者俾市之而鄉士大夫多尙義乃輸貲粟

以佐費公涓吉辰授意匠鳩工簡徒考極度區分工計日

選員役之才幹者董其事且不時省視別其勤惰辨其工

拙未嘗少休以是人皆畏懷嚮伏始事於仲秋上旬甫再

月而大工告竣修正殿兩廡戟門靈星於戟門左右爲兩

掖與殿東西掖相植靈星門外爲兩坊東西翔起其南樹

巨屏而刻石其陰曰太和元氣屏南爲泮池大勢環抱學

宮殿後爲明倫堂大廈前抱爲東西齋爲兩翔門堂後爲

敬一亭左爲啓聖祠前爲名宦祠又前爲號舍二聯左之

左闕隙地爲射圃亭扁曰觀德東南隅起樓櫓以名龍門

遙與西之儒林坊相映堂之左爲夾道南北矢直可百餘

武建儒學門三楹右爲文昌祠前爲鄉賢祠爲號舍二聯
併寓於左者共二十楹俱負陰抱陽晴窗風牖曲盡其制
生儒肄習稱便前爲神厨神庫省牲所或創新或易故遺
計爲屋凡若干楹爲門凡若干扉階墀則整飭關鍵則嚴
密莫不宏深壯麗端直軒豁無遺制焉且製爲祭器若簠
簋登鋤龕幔之屬亦皆考制度折衷膾炙耳目皆以爲前
此未聞見也旣成蒙泉蒙多士感公留心本原百年之廢
興於一旦不可無述以紀其盛余因其狀而飾之又僭一
言以諗多士曰若等知公修學之爲功抑其知自修其學
以成公之功乎蓋公之修學如前所陳是有司之修學而

非士之修學也士之修學將以學爲聖賢而已是故以方寸爲基址五典爲堂奧四維爲垣牆六經諸子爲戶牖所學旣成上可以柱石廟堂調和鼎鼐下可以帡幪斯世增宗廟之光斯無負於朝廷建學有司修學之意而典風化者亦與有榮焉清士固多豪雋其必不負吾言矣是爲記

隆慶元年六月穀旦

秦公祠碑記

明 吳寬 大學士

舒城秦公以工部員外郎奉命守廣平清約自持濟以勤
慎每日未出坐堂上吏抱文書以公事咨稟必詳審可否
莫得容私爭者立庭下皆俯首心服無一人稱冤者若死
刑尤緩其期往往平反或遭水旱災卽具實以奏徭役則
視戶口多寡貧富定其等第無弗均者先時里胥多隱占
糧地公遣人四出相視得地二千四百八十餘頃悉給貧
民耕種由是賦稅皆足招撫流移至五千八百餘人又立
養濟院漏澤園尤重文教人材始盛自春秋以來聖賢墓
悉加封護公之善政大畧如此秩滿將去民攀留者塞道

至不得行公既擢江西參政累遷至南京兵部尙書參贊
機務其後宏治十四年都侯陳公欽至其爲政大率如公
民愛之曰何我侯一似秦公耶侯因詢舊政父老猶能一
一道之其色愀然有泣下者公曰求文刻石以慰爾之思
可乎皆曰幸甚侯述其事來請予予昔佐吏部獲與公爲
寮友蓋素知公因爲之記而繫之以詩惟昔任人莫善於
漢循良屢書見於史傳其人如何其政何善赫赫無求默
默自居不使斯民一朝驩虞史亦有言不失之誤日計不
足歲計有餘如龔如黃世豈終少古訓不忘子民有道民
親平易政尙體要率是而行漢人克紹曰我父母曰我師

保去之遙遙傳之父老燕山壯時壯哉神京分畫甸服曰
有廣平天子擇守惠此黎民秦公昔來父老前迎我戒僕
夫六轡緩行吾官雖尊斯民勿驚惟此大郡吾治何能不
撓獄市惟靜惟清治之踰年政於何有獄無赭衣家有南
畝豈不徭役赴者恐後豈不征科輸者恐負孰襪衣冠孰
取箕帚里俗自敦士風自厚問何爲然曰有賢守古之遺
愛民不忍忘陳侯避舍秦公在堂勒石示遠永垂耿光

--	--	--	--	--

五公祠碑記

明趙廷瑞尚書

廣平輔郡也其屬邑清河地鹵斥汗下民恆苦水患極窶且艱東南新集鄉曰蓮花池者國初有沮洳田七百餘頃令民開墾蠲其稅後德藩以爲閒田請之田遂入德藩歲徵銀一千七百兩民始告病正德初逆監擅權奸人乘機投獻咸吮慶陽伯夏儒因請爲莊田賂逆瑾差中使來按指地三千二百餘頃嚴刑迫民崑課十倍於昔民至鬻產易子不能輸愁苦無聊逃亡相屬而豪勢僕隸多市井罔顧橫行鄉邑有司相齟齬莫敢誰何民罹其毒屢叫闕陳訴不報正德八年柯漢錢壽時爲侍御按歷轉出闕積

以奏臆知其情力爲陳請命廣平知府華君查理始得減
課如德府之數畝徵銀五釐二毫五絲然瘠土之民財力
俱困譬之疋羸之人雖扶策強步病根猶在而豪猾每於
常課之外垂楚剝削必極其欲而後已加之水患相仍蝗
蝻爲災轉輸不前控訴無計哀鳴嗷嗷相視待斃又羣往
申訴於朝恭際皇上御極洗滌弊政百度維新敕科道部
屬才望德器爲朝廷所推者往勘於是令上柱國少師桂
洲夏公奉命行焉同事則前兵部尙書雙巖樊公以御史
行武昌知府張君以戶部主事行比至桂洲公矢心徇國
得其奸狀清河被害之實具疏聞朝乞以地歸諸小民止

輸常賦天子可之詔奪以還民俾世惟政之供毋變貴戚
斂手屏息而烝黎始知有生之樂矣於是逃者復病者起
困苦瑣尾者謳歌忭舞徧於四野漳洛之間熙熙然一樂
國也邑人懼無以圖報遂相率立祠肖公而俎豆之朝夕
展拜十餘年後祠爲水圯嘉靖庚子春邑民葛振綱宗舜
等乃聞於撫巡爲措財以新之明年春三月工告成祠堂
五楹中設五龕正中少師桂洲夏公之像桐溪錢公雙巖
樊公翼其後太守華君張君之像侍其在後寢五楹前後
東西各有廡廡各三楹碑亭二座大門儀門各三楹前立
綽襖後闌圍圍繞以藥垣墻以支右扁曰崇功勳德生廟

澤主者守視局鑄可祠祀置田五十三畝爲主廟者衣食
之供凡所以裨於祠者靡不周盡歲乙巳蜀唐君來守廣
平乃磨石以紀之少師名言字公謹別號桂洲江西貴溪
人錢公名如京南畿桐溪人官刑部尙書樊公名繼祖山
東鄆城人華君名津無錫人張君名希尹臨清人唐君名
權富順籍南昌人銘曰河山兩界畿輔黃圖昔有羨田爲
灌莽區在昔先朝令民開墾併蠲厥稅誘之趨本巨藩肆
侈逆豎播權殃民括利衆始騷然浮豔障天妖狐當路嗟
嗟彼民叫閭何訴我皇嗣統萬象更新解煩滌弊民怨乃
簡遊命近臣荷鉞往勘殫劾孔嚴權姦亦憚龍庭入奏帝

爲允俞明詔一下彫瘵旋蘇民食民衣明公所賜白乳流
離今悉順治崇功慕德慈母是依創祠肖像如暈斯飛陶
宮盤盤歲時虔享桂醕蘭餽登歌在上行山屹屹洺水泱
泱山泐川竭勲德靡忘

五公祠碑記

錢如亨

今畿內邑有清河地多曠薄其東南二十五里有地曰蓮
花池曰新集約七百餘頃久蕪不治我祖宗重本勸農聽
民開耕永不起科後德府指爲隙地請於朝而與之歲課
銀一千七百餘兩而民始困矣武皇臨御初慶陽伯夏儒
以感畹新賢好人乘間獻以前地值逆豎播威矯命大臣
往按之時下邑愚民間天使之至惕若雷霆皆竄伏苟生
悉聽奸人指畫增定課銀一萬三千餘兩民初償以蓄資
再及牛具服用又再及妻子而所遺者倅依憑城社益肆
其虐民弗堪命有徙亡者自經者殺於河者無所於控劑

羣訴於天庭下有司議謂業有成案弗敢更民復疏十數
上弗止停閣積年正德壬申歲余奉命出按畿內卽驛往
詢之見其墟市蕭條田野外人煙斷絕止有羸民數千遮
號乞生馬首羣情洶洶弗能靖時郡守華津民者亦留心
民事乃與議利害其實以聞乞如德府舊徵而原疏過情
者仍以數人抵法事下臺如議以覆武皇可其奏民雖歡
若更生而力猶未盡紓也今皇上御極之年覃布仁恩於
海內民復敷上之上命臺諫官覈實悉蠲其增課地復歸
民而止以正賦通均其征民始樂業日就洽熙矣閱嘉靖
乙酉冬予以浙江憲使人覲之臨清舟止於凍乃令士人

募車以行時民有宗安者業於車園予姓氏謂之曰得非
昔日之錢公乎因請予舟物色之遂轉相招告次早挽車
而至者數十乘道經新集老少遮道而告曰我輩德公無
以報今祠公於此圖像於家以永世世予車覽之則有新
建二祠左曰繡衣錢公生祠右曰太守華公之祠予惕然
以省衆乃合詞而請曰我輩民隱非公其孰達之天聽事
之顛末非公其孰知願爲我記之予以行迫未之許爲酌
村醪數觥而就道衆乃攀送數程而別予時去按十有四
年而擊守巴物故久矣非有爲而爲者於乎斯民也其所
謂擊壤之遺民者非然而謂吾人不相及者越世之

言也後予移官貴陽旋泊油坊集而宗安及其居民王景
山輩迎候固申前請聊出此以復之亦因以識愧而警夫
有位焉

修城隍廟碑記

邑令 向日紅

清河城隍廟舊在縣治西已遷之東邇復歲積日就圯乃
水旱盜胥同時並作邑父老以其崇來謂令予紅予紅曰
吁厥咎令奚其神夫神與令非天子命哉天子命神以城
隍保捍寄焉命令以父母愛養寄焉二義相須而隔幽顯
含顯易而圖幽難民務之謂何用惟蚤作夜思諸圖於理
及暮年而年大稔河伯不爲殃杙鼓息而災祲無行邑父
老又以其庥來謂令予紅予紅曰吁厥功神奚其令且而
以神之神詎止此乎嗟人情每惑於其所易見而惕於其
所不易知法增氓之新易見而惕者民之所不可知故

之所禁有限而神之爲教彌窮豪民每梗於三尺至有不
信則散髮具諸巫走神牒清之牒者十夫而九也蓋風乎
愚夫愚婦或不盡解於禮法乃其歲時游神宇中見諸善
惡之報輒縮項合掌相視毋爲所誠斯畏神反甚於畏令
矣以神足憚民之善惡瞻視莫不肅矧其樹保障功諸父
老則唯唯而作卽日庀材鳩工厥新維象厥彩維堂厥創
立維坊厥金碧丹堊維左右之傍擇吉告成於廟令予紅
乃諭諸衆曰惟爾弗淑惟法則爾鞠惟爾弗平惟神則爾
臨爾弗懲耶而孜孜以干於神耶是夕乃夢一偉人峩冠

博帶登堂而歌歌曰嘻搖搖風瀟以索兮於產隆道廣以

莫分子總總卒理於落兮嗟乎興哉新片之福人論我矣
因併記之萬曆三年仲冬穀旦

改建秦公祠記

邑令 向日紅

公累遷至兵部尙書參贊機務者二十餘年而以成化十年來守茲廣平其後去而爲宏治之十六年邑父老思有如公者而不可得乃建祠勒石於邑之東南集曰油坊視郡人之碑思其去者愛尤加焉又其後祠而爲嘉靖之末年以當河流之衝碑存而祠蕩然矣愛甘棠而悲禾黍者至每低徊歔歔弗能去先是令爲李宣府嘗有志而未就也屬郢人東方生至則以問邑之名賢勝蹟於古得張睢陽廉將軍之故實而於今亦得二人焉少師夏公言與公祠而公祠獨圯甚思以表章之愧才不逮一日以河工過

故公祠則父老之攀訴者環集如鱗於是門下士劉子渠
王子學詞輩具言民所以不忘公狀明日改祠之集北隅
當兩都之孔道厥位面離赫赫然顧瞻中堂真有如公者
在矣嗟乎世人權使其民朝令夕背卽有小惠旋且易謾
而公以去後之思直繫人心於百年之下甚有禱祠遮道
血食墜淚者於以見燕趙慕義之風今不殊於古也公德
政在兩石碣中東方生不以贅而特爲紀其略如此公名
民悅字崇化直隸舒城人東方生卽清河令向日紅楚大
治人萬曆七年九月穀旦

修護河隄記

明 賈待問 都衛

清河在前代爲望郡又曾置王國其所轄地有運河二哥營在其南賈家口在其北厥東岸屬夏津縣西岸則屬清河舊有護河隄長四十里每遇秋水縣大夫督夫千餘昏旦隄防誠慮河一決則敗田廬沒禾稼災及城邑不可救藥無論元宋以前在我朝世宗時庚寅水決白廟口會天雨大注合境瀾漫運河舟楫通城門外至有繫嬰兒於樹上民患苦之迨戊戌又水迄甲辰視戊戌尤甚穆宗時己巳夏水更溢城不下者三版焉以故是邑河防視他務爲要若二哥營鋪內有謂邵家莊圈地方卽尤其要者其地

故隄頻年屢決決輒病民洶洶然莫知死所邑侯王公憂之焦毛髮甘握吐周詢廣諏者再四計於故隄外益以月隄蓋既爲民防川且以爲國重漕厥計誠亟厥慮至深遠也於是請於督河潘公安撫宋公侍御何公咸下檄於兵憲于公郡守喬公反覆議查皆報可按公所議月隄長一百八十丈底闊三丈頂闊一丈五尺高一丈二尺許分工十工答一十八丈夫一百名共千名原設漢夫四十八名今各僱餘夫一名共九十六名工食皆已有者此外止派夫九百四名每名日給工食銀三分於甌縣行差地畝均攤每地三頃六十八畝二分七釐一毫僱夫一名給以花

名地數印票計日收討工食不得預支亦不得私攤幫貼以滋他弊隨委管河典史周制督之仍遴選義官高惟岳等分工修築公不時躬親查勘以是隄堅而固可垂永久工始於萬曆十七年十一月十三日成於十八年二月十七日內隆冬寒沍工暫停通止計工二十四日費省而工用以完今二十年淫雨作沴臨清之楊家集威縣之邵固堡平地水深丈餘滄沒腴田萬餘頃室廬難以數計清河二哥營一帶地方俱安堵如故得免衝擊之虞清治部士致任州判邵子書生員王學詞等感公之德沐公之澤託余言以紀歲月余以公之性澄以澈公之量汪以蓄公之

才晶以敏公之猷塞以壯公之守冷冷耿介皎皎乎不染
一塵是故其澤物洗冤而獄無沈滯蠲繁疏穢而政尚清
嚴厥令持平而法除深刻一令出則如源之開卽猶胥奸
書不敢稍有壅遏以索一錢一害去則如流之迅卽土惡
衝靈不得幸脫網罟以恣大奸鄰邑諸若令悉願執鞭當
塗者極目其賢下檄旌褒更題疏刻薦者屢良以公心如
水故治邑有冰蘖聲旦夕躋顯登崇卽大君子作舟楫以
濟天下或亦以此治河之政拓之耳公姓王諱守禮字秉
節號亨吾以文學登歲進士西涼之永昌人余以提戎撫
若地知公誼重鄉評又威距清河未百里濡公至攸人荷

公愛最深不敢以不文辭勉爲記萬曆十八年三月穀旦

--	--	--	--

重修清河縣學宮記

邑令

三韓胡文煥

歲癸卯二月十二日余蒞任茲土甫下車謁 至聖廟見
殿宇傾頽莫蔽風雨兩廡蕩然并先賢木主零落無存余
甚異之清河古稱名郡歷代幅員廣狹人物盛衰雖沿革
靡常隨時遞變至於學校之地乃尊賢養老考藝選材諸
大典所繫者也今廟貌不治若此春秋釋奠徒具虛文

聖天子

作人之至意余不且未由以副哉然於時國家定鼎未久

海內卽已廓清大定閭閻生聚未蕃余何敢遽興土木期
年地方小有安集余亦習知人情趨向乃集耆老紳士共
相斟酌余言出而應之若響夫仁義道德人心所固有觀

泮宮廢墜皆有安放安仰之懷故歡欣鼓舞惟恐修葺之
後時也於是庀材鳩工自檣棟構榑爨爨之屬除風雨剝
蝕朽敗者一一更易之正殿兩廡次第告成堅而整質而
無華望之翼然余有事廟延俎豆簋簠犧牲玉帛粢然明
備瞻仰升降宛在杏壇之間余既幸學宮之成因念禮讓
興行風俗純美上體 國家崇儒重教之心余乃得借手
塞有司之責清之士風純厚民情樵魯頗有三代之遺一
變至道若草上之風學既成而絃歌雅化猶俟後之君子
則余所深愧也是爲記時康熙四年歲在乙巳季夏立石

清河縣重修學宮記

聖裔
孔衍樾

清邑古厝地也今屬廣平處東偏鄰鄒魯焉聖教靡遠弗
屆矧近聖人之居耶邑學舊在縣治之西自金大定間始
移建東南闕厯元迄明亦屢次重葺而地氣斥鹵圯壞頗
易日復一日荒蕪彌甚久則修復愈艱學宮頽墜曷自興
茲請哉三韓盧君士傑自康熙癸丑秋撫臨茲土歲時瞻
拜輒俯仰咨嗟毅然有敦崇聖教廣勵人材之志爰與學
博李君糾集諸生而謀復故先捐俸金以爲闔邑倡人情
踴躍如赴響焉乃程土物乃度財用乃畧基址大殿重新
欲其固兩廡增葺彌其闕啟聖明倫美厥輪奐戟門靈星

時以威儀移文昌祠於左建太乙閣於城名宦鄉賢二祠
漸次偕作焉噫既不廢義又不辭難可不謂甚盛舉歟余
向嘗承乏澶淵與盧君治相接誼甚篤也學成請記余欣
然願爲一言以勸多士曰王者建國教學爲先學校者化
民成俗興賢輔治之要務率必由是漢以少牢致祀唐以
袞冕加榮迨後推崇倍至而聖教大光如日月經乎天江
河互乎地家絃戶誦爲子知孝爲臣知忠名賢碩儒彬彬
出焉學之闢於世教人心者如此爾清邑得賢宰俾爾由
庠序踐古人之跡教學弟輩廉恥相率談禮樂以陶吾民
且起而有爲奏勛名於皇路措經術爲世用庶昔之周

房崔元諸君子再見今日是惟朝廷建學之意亦卽盧君
修學之心也余聖裔也樂道崇聖廣教之事固歎是役修
之維難成之匪易而盧君之留意政教者深也爰勒貞石
以垂永久後之宰是邑者尙其有感於斯記云時康熙十
七年歲在戊午暮春上浣立石



新開井記

盧士傑

清河斥鹵地也徧地如雪霜其水鹹不堪飲日用所需皆取汲於城南小井中城之內外雖民居寥寥然一井之水豈足以贖汲者故旋取旋竭則勢必用鹹水人皆苦之遠而取之十數里之外人尤苦之夫水爲日用所必需乃珍貴如是艱難如是無他食者衆而生者寡也今欲期其至足惟別穿一井以佐之而後可余自下車以來簿書鞅掌忽忽數年雖有志而未逮茲幸政簡刑清民安物阜春光爛熳化日舒長讀擊壤之歌曰耕田而食鑿井而飲真樂事也爰捐俸鳩工擇地卜吉新開一井於舊井之西數

日之間不兩軻而及泉醵團堅整味色甘清汲者源源而
來因憶昔人廉潔自愛者動曰僅飲某地一杯水耳若夫
清河之水誠不易言飲也斥鹵之地勺水維艱涸鮒待潤
遠莫能致今因民之利而利之其養而不窮之謂乎自有
斯井吾願飲此水者可以洗心可以滌慮政刑清於上有
如茲水焉風俗清於下有如茲水焉夫而後清河一杯水
上以成廉吏之操下以貽萬世之利兩有裨焉若曰期後
人飲水而思源則固非余之初念矣禮云井居五祀之一
今井成而祀之偶筆數言勒之於石康熙十七年歲次戊

午三月穀旦

重修察院記

盧士傑

察院之設所以肅行臺而駐使節也會郡州邑舊制皆不廢蓋以節鉞所臨非此不足以示尊崇固不因地之衝僻爲有無也清河僻處偏隅地遠孔道兼以滄桑屢變民舍寥寥察院一署數十年間委諸荆榛草莽中矣冠蓋之往來輒假民居而部屋窮簷何從有甲乙之第閭闔之門以容結駟其不足以尊體統而肅瞻觀者匪伊朝夕矣雖上臺不常涖止然過此虛位觸目驚心又何得視爲不急之務聽其湮沒於荆榛草莽中乎余自下車來卽慨然擬修復之以風塵鞅掌且月跳丸閱猶六載靡有善策將取之

於公則各費奉裁將取之於民又恐滋多事因謀諸鄉耆
公直必期毋勞民毋傷財而有成功不貽築室道旁之誚
其庶幾已鄉直滕運昌馬宗堯等力任其事領袖衆人各
助一工物料則現償價值匠役則日給工資不費民財不
勞民力經營落成且完固周密井井而翼翼焉觀其規模
整肅堂室宏深巍乎煥乎君子之至於斯也不有以尊體
統而肅觀瞻乎數十年頽垣茂草一朝而輪奐殊觀伊誰
之力歟其諸上臺仁政遠敷有以愛其下斯衆百姓好義
終事卽有以忠其上耳區區縣令優游無與坐觀落成亦
甚快事也壽而誌之用垂不朽康熙十七年歲次戊午九

月上浣

--	--	--	--	--	--	--

新建藥王廟記


盧士傑

人稟天地之氣而生天地有陰陽燥濕之候而人有喜怒憂樂之情其或天時人事之失宜遂因之以生疾病古聖王首出御世知人之有疾病而救藥之故自黃農君臣創爲本草素問難經諸書開千萬禩醫藥之源而登千萬禩於樂壽之域後世尊崇之爲藥王其來久矣天下都邑無小大多建宇而祀之清河昔雖百雉今僅彈丸滄桑非一變所謂藥王廟者此日之既無亦不必問當年之曾有也我

世祖御極之秋邑民南鄉李氏者募銅鑄像爲六丈之身尋

復以厥鄉荒僻移而安奉於城中余承乏茲土下車時觀
城市荒涼民居寥寂至於泮宮察院與諸神祠皆剝落傾
圯或爲瓦礫或爲茂草思欲盡爲輝煌之有非旦夕所可
冀者濫竽七載竊幸政簡刑清悠悠閒暇之中可得以次
第而補綴業先修泮宮以隆起化之地次及察院以備駐
節之庭皆不可須臾緩者若關帝若城隍爲護國佑民一
方之福德正神瞻其廟貌雖有凋殘而靈光儼在尙無待
於畚築之勞獨藥王一廟未建於前不能不補茲闕略爰
爲捐俸鳩工逡巡幾二載甫竣其事今且落成矣雖規模
未極宏深而殿閣門廡美輪美奐在此地觀之亦庶幾合

度耳其上建玉皇閣以事昊天夫天卽理也何像之可求
第與人指點於冥漠之中又不若與人瞻仰於顯赫之際
神道設教其曷可少歟下卽藥王殿奉金容之璀璨禮冕
服之莊嚴伏臘歲時偕我白叟黃童得以虔修祀典當亦
不朽之盛事也昔人觀河洛而思禹功今一邑三鄉羣庇
福蔭而躋春臺則頌藥王之功又何可暨極哉敬爲之記
康熙十七年歲次戊午七月上浣



祠堂碑記


胡悉甯

邑侯盧公諱士傑字漢三奉天錦縣人也以癸卯科舉人
筮仕爲清河令一登仕籍治行多異數年來士農歌其德
政者已載在口碑今且爲肖像於祠而尸祝焉邑之父老
屬余爲辭以記之余曰甯不敏何能紀公之德政乎諸公
沐浴旣深其必有以命我也於是父老爭相告曰邑於郡
爲末屬土瘠民貧凋弊已甚自公蒞茲土若良醫然扶衰
起痼慨然以拯濟撫綏爲念德化之流傳未易更僕數矣
若夫釐奸剔弊易俗移風以惡受見德以果達見才六年
之久表裏如一始終不渝其事皆班班可考也錢糧則自

封投櫃緹徵薄斂不事敲扑而國賦全輸刑名則惟命盜
重案置之於法餘則戶婚田土爭鬪之類斷理和解極不
苛求因是吏畏其威民懷其德訟旣無而刑亦措矣向來
凡有差徭苦樂不均至有用一而費十者公爲之按丁均
役省一切無窮之煩費自學宮以及城池察院署宇修整
完固不勞民不傷財者非特爲一時之利已也公之清操
節用又人所不能及者不取行戶一物不短市價一錢卽
飲清河一杯水亦係捐資鑿井而然至今南郭外三里許
往來之人猶指相謂曰此盧公井也古稱循良之吏無如
召杜由此觀之昔之頌召父杜母者想亦如今日清河之

頌我公也吾儕沐公之澤實大且久今幸構斯堂得以朝夕瞻拜其下敢不敬求一言以代甘棠蔽芾之詠乎余聞其言而善之且曰美哉公之爲令也其德異才異政異果惟邑人知之亦果惟邑人能言之也用是不自揣而爲之

記康熙十七年仲夏旦穀



重修學宮碑記

聖人億萬世之人心也尊聖不可以不正心也尊聖奈何
修學宮其一端也正心奈何修學宮其示之則也曷言乎
示之則也心身之所主也經術文章心之所發也人之有
心固欲其中以正固以安平以坦也固欲其有防閑而無
出入也固欲其虛靈而活潑廣大而光明也非然者心且
壞矣而徒尚詞藻猶繪畫加於朽木而朽糞土之牆也故
曰修學宮其示之則也癸丑夏余承乏清邑謁學宮見茂
草狀怒焉不克終日以歲輸民且苦飢未暇興土木事明
年甲寅元氣稍復因亟與師生耆老議其舉而制憲又適

以狀問乃剴切陳對兼議捐既蒙報可僉謀乃定於是寸積絲累首先大成殿明倫堂崇聖祠次兩廡甬道戟門靈臺門道德坊又次文昌祠奎樓名宦鄉賢祠陸續告竣是役也欹側者整之中以正矣摧殘剝食者新之固以安矣道路茅塞者闢之而砌以石平以坦矣築垣墉以嚴出入防閑立矣泮池舊制淺且隘矣上架三橋掩不滿池面者尺許下黑於墨濬之擴之并拆其橋二虛靈之象呈而活潑之機著矣未已也學宮定式有靈星門而無照壁惟地當通衢者間有之以便車馬往來也然氣象蔽塞無洞達寥爽概清邑學宮在城東隅地僻本無事此乃撤而去之

外臨一陂大可二畝水光瑩瑩直射殿宇抑何胸襟廣大
而眼界光明也茲計其功始於雍正甲寅之冬訖於乾隆
丙辰之夏閱二十月而落成於是美實在中英華發外載
勳載聖載丹載藻畫彩輝爛炳若星日都人士女交口嘖
嘖鄉人入城者必往視之若勝蹟焉而諸生乃議建碑以
記願未走白於余余進而止之曰若將以政通人和百廢
俱興之說美是役之功於令乎令固不有其功也且令之
修學以尊聖特尊聖之一端耳若之當自修以尊聖者正
未有艾也令之修學令爲之若能助之若之當自修者若
爲之令不能助之若果能卽修學之則以返求諸心無偏

陂無頽廢無茅塞懷雉犬之無形契鳶魚於有象宅以昭
明期以廣大將人人心中有一聖人則若之所以尊聖者
大而令之所以修學者亦於是乎有功然而若果能耶否
耶若乃忘身心之要務誇廟貌之維新彼二氏子弟所爲
琪宮寶殿金碧莊嚴以尊奉其師先者且爲吾輩所不及
又何以鋪張而贊美爲諸生唯唯因請卽以是言勒於石
且曰將以使吾黨習見之以爲正心之則也不亦可乎余
固弗能卻矣雖然勒於石終不若勒於心也諸生勉乎哉
是爲記乾隆元年歲在丙辰黃鐘之月上浣山陰進士清

重修學宮碑記

古者取士於農故鄉學與國學並建豆籩鐘鼓於此設焉
簪髦俊秀於此育焉教化之隆替風俗之醇薄人材之盛
衰莫不關於學校此卽郡縣立學之所由昉也顧建學明
倫卽釋菜以尊聖芹藻薦香罇彝淨習用將祀事之孔明
者固不惟致飾於刻桷丹楹亦何容棲神於頽垣破壁清
邑文廟歷年久遠自嘉慶六年經前任莊重修逮今二十
餘年風雨剝蝕兼之地基斥鹵戶牖垣墉半歸殘缺儒學
立意修復而未果丙戌冬適余承乏茲邑謁廟時儒學亟
以修復相商爾時正值憲牌督修縣倉事難並舉丁亥秋

淫雨連縣大成殿榱桷崩折神龕暴露儒學倉皇告余余
卽往視心甚惻然事難再緩卽以修復之事屬儒學儒學
因傳諭闔學生員悉心籌畫文生李九苞首舉千總銜邑
人田澄清情願捐銀倡率兼董其事公勸之議遂決歲貢
生王名世廩生張希聖簡存密等分行各路竭力勸捐至
戊子春章程粗定鳩工庀材於二月十九日興工閱七月
而大成殿崇聖祠文昌宮東西廡戟門靈星門明倫堂名
宦鄉賢忠義節孝各祠以及照壁羣牆漸此告竣繼而諸
紳士請記於余余曰諸紳士捐修文廟詢可謂樂善而尊
聖矣抑知尊聖之事不以修文廟終正當自修文廟始乎

尊聖於廟卽可見聖於心有是心而培之使厚拓之使寬
砥之使新濯之使潔其事可喻諸修文廟自時厥後敬桑
梓敦孝友飭廉隅凡居心制行處世待人莫不祈禱乎聖
以爲齊民率何者非修文廟之心擴而充之者乎故曰尊
聖之事不以修文廟終正當自修文廟始也是爲記道光
九年次巳丑季夏上浣進士陳師魯撰


清河縣雙忠祠碑序

兵科給事中 夏獻馨

樂毅關龍逢紂殺比干作千古暴主之備武周封比干墓
湯亦封龍逢墓否龍比之忠足以光國家而馨閭里至今
商邱朝歌亦聞有以祠祀之否漢桓帝殺諫臣白馬令李
雲司馬昭南闕作亂殺魏忠臣王經二公皆生於清河其
忠烈之氣未知與龍比何如李雲有墓王經無墓均不聞
有祠而祠宇之修乃遂成於二千數百年之後吁奇矣竹
堂王君馨壬戌所取士也其學問文章見重於瑞芝生相
國羅椒生大司徒皆不忍以弟子之列列之供職比部時
每欲集繪二十四忠圖以配二十四孝借以維綱常而廣

教化李王二公咸在焉圖未成少君鏡泉太僕戰死清豐
遂改官直隸丙寅初委任邱循聲懋著庚午復權南和首
修宋文貞公祠繼建忠義節孝循良各祠捐資數千緡不
吝平日則布衣粗飯邑人稱道不衰卒未調署清河清河
僻壤也缺之瘠苦甲於天下下車首訪二公祠墓慨遺跡
之無存愈創修之有志秋分後偕紳耆修整 聖廟戟門
外重建名宦鄉賢龍神火神名祠工竣復建二公祠於通
衢曰雙忠繪其象聯其楹並考其跡而崇其墓以遠慰忠
魂嗚呼州縣若竹堂可以風矣前乎令清河者不知凡幾
何以置若罔聞也夫人臣殺身成仁似非 國家吉祥可

願之事然當時以爲凶後世以爲吉迄今祠宇輝煌始歎
桓帝司馬昭之成二公者大矣竹堂起而創之天下踵而
行之明禋之典無非忠義之魂此舉之闢繁誠非淺也祠
成索序於馨馨不文不足以闡揚二公辭則不敬固勉成
數語而寄之以勒碑首



陳公傳

邑人 劉步嶺 舉人

太史公曰死有重於泰山有輕於鴻毛蓋死不當死雖山
一時激烈而沒後聞寂終與輕生者等惟我陳公明決有
膽略威豐辛酉奉檄泣茲土數月無滯獄無冤民已載在
口碑迺三月間教匪張善繼等聚黨數千人竄擾曲周威
縣等處四月初六日進掠邑境南王官莊大寨等村賊勢
猖狂城中聞之大驚一時男女兵丁風流雲散公沿街厲
聲曰賊氛密邇勢實難支我有守土責誓與此城存亡願
從我者捍禦不願從我者逃萬不得已惟有死而已是晚
公親率僕從數人終夜巡城毫無怯志至次日晨刻賊知

城內空虛竟入東門頃刻如蟻攢蜂聚塞填街巷公知獨
戰無益罵賊犯其鋒而死時在咸豐辛酉四月初七日死
之後闔邑紳民爲之泣數行下事聞奉

旨建祠於關帝廟古舉春秋祀以慰忠魂與清終古是則公
身雖死而浩氣英光不可磨滅真可謂死之重於泰山矣
公四川成都灌縣人名大烈

趙公傳

邑人楊一峯舉人

秉兩間之正氣志節常伸樹一代之英風聲聞不墜然循良載史冊亦更僕難數矣而犯難衝鋒舍生取義者不可多得蓋忠勇出於性真非一時矯激所能爲也吾於趙公有慨焉趙公諱維煥字叔重江西建昌人咸豐二年任邑捕廳每決一事立一政無不切中時務其精明強幹已載在口碑洎辛酉教匪肆擾大順廣蹂躪幾徧陷曲周圍威邑烽煙告警無虛日四月初四日賊由威東窺擾所過焚掠一空初七日黎明賊蜂擁撲縣城城中居民不滿百餘家俱聞風星散且守卒寥寥缺糧乏飲實難嬰守公慨然

邀寮友詣邑侯陳公所僉詢計將安出公正色曰城亡在旦夕不可坐視能守便守誓以效死弗去既而賊至城破陳侯以罵賊不屈殉難公偕阿叔德言妹丈黃欽苑並帶家丁白貴等挺身戰賊毫無怯志乃寡不敵衆遂同犯其鋒而死死之後邑人孝廉公楊選齋與櫬收公身首權葬城隍廟之西偏士民觀者如堵咸太息流涕事聞奉

上諭追贈州判從優議卹加都察院經歷銜兼給雲騎尉世襲罔替與陳侯並祀昭忠祠

誥贈武略騎尉姜公墓誌

蓋聞光前裕後事有必至作善降祥理有固然惟我姜公
諱衛清邑望族也前世皆以隱德不仕公獨毅然有志功
名思以文章見實用乃懷抱利器未獲實識遂援例入成
均閉門埽軌絕意進取以勤儉持家孝友垂型族黨中有
困乏輒助貲財敦任郵與僑衆相往來抑然善下無忤物
色所謂謙尊而光者公其有焉夫積善獲報感應不爽閱
數十年而門第果大發公之曾孫天錫天彪一擢漕標都
司一擢藍翎侍衛淮陽飛輓克供倉庾之儲鑿與前驅不
負韜鈴之略兩受榮封光生泉壤亦足以酬其素志矣祖

武箕裘家聲麟鳳甚不可湮沒而弗彰也因撫實以爲之
叙

例贈武德騎尉田公墓誌銘

秦強 李鼎文 舉人

蓋聞子公積善宏開駟馬之門卜式輸財終列侯封之職
爰稽書言福善易象餘慶變乎尚矣侯其禕而恭維坦翁
諱益泰矢志慨慷立品方正輕財重義敦善宏施俾爾哉
穀榮貴允宜其次子漣漪公捐修大成殿學憲會旌其門
獨修奎星樓邑侯復賜以額書院建修同議籌款公預墊
金無難色其勝舉固昭人耳目矣且桂子聯芳蘭孫旋發
令長孫麟趾公又捐修文昌閣橋梓濟美寵賜宏獎固漣
翁盛德之榮實厥考累仁之報用是勒諸貞珉以垂不朽
贊曰青齊名胄甘陵善良美備鴻蓄純嘏延長休哉盛德

崇奉斯文殊思渥錫福祉流芬溶溶春水霑霑卿雲德澤
餘邈山高水深宜慈和惠榮貴攸宜堂構翼肯介石永垂

邑庠生例贈武翼都尉謝公墓誌

謝氏望族也居清河之謝壚集世有令德例贈武翼都尉九鵬公字登雲號萬里器識深沈儒林重之幼坎坷以豐裕終捐館後諸同志惓惓不忘述行畧於余欲垂之不朽余不獲辭因摭實以爲之敘公幼而岐嶷家無中人產畜志誦讀以登青雲爲務昆季同補弟子員華萼輝映怡怡如也嗣以艱於養志遂輟舉子業經理家政不數年居積以億萬計而自視歆然親宗族睦鄉黨謙德和光無忤物色適閒步村墟值呱呱者棄道左急遣人襁抱歸育之成立遇里閭婚喪甚窘者輒出資以助鄉人偶有爭忿諄諄

排解咸得當以去邑修經可善院工費浩繁公監督辛勤
預墊金無難色工竣明府曹公旌其門曰崇學培英嗣君
引之克承庭訓倜儻有不羈才以舉辦團練得保舉賞戴
花翎加遊擊銜以儘先補守備候銓蓋明德之後有達人
公之培莖使然也爰爲之歌曰惟德惟才植品斯賢富且
貴兮膺天年嗟偉人其升遐兮翳流風餘韻之孔傳山何
高兮土何厚惟貞砥之是鑄

誥授奉直大夫廩貢生楊公墓誌

南宮

趙振名 拔貢

甘陵故多聞人擢高科登顯仕累代不絕世伯楊小時大

夫尤卓卓也公

名翊字選齋

號

小時行六幼岐嶷不事家

人生產從長兄數飛公學耽讀無倦容弱冠失怙服闋後

補弟子員越二載而食餼爲求得真字訣試輒居優等名

謀一郡師事臧子固佈宗泗兩明府皆器重之教諸猶子

讀並英年爲邑知名士嗣從游日益衆豎聲譽序者未易

更僕數奉侍萱幃藹藹以孺慕聞有四昆終其身交愛無

稍間性揮霍生本素封以施濟家漸落飭廉隅敦風節解

紛排難不避嫌疑然和易從容無忤物色庚戌闈邑舉孝

廉方正入赴棘闈未售京兆遂輟舉子業以太夫人年高
爲顯揚計援例補武強縣教諭踰年闈母喪星馳旋里居
家讀禮適教匪擾畿南辛酉春陷邑城公聯絡鄉團捍禦
勦除一方賴之王戊難平以軍功議敘知縣候銓山左閩
中丞重其品甲子秋委署莘亭及之任清理積案獲餘匪
數十人支應過境兵俱帖然不忍肆滅糧漕價以故無逋
賦縣再試衡文嚴而得其正士庶感戴恭晉萬民衣繖上
憲聞之亟稱曰賢遂加同知銜護衆幾二稔以鞅掌勞瘁
染嘔血症丙寅夏就醫桑梓囊橐蕭然有鄧伯道風總公
生平應登期頤壽無愧也未幾而疾革於七月中旬捐館

舍時年五十有一宗黨僚友莫不悼惜之無似續長兄次
公子一聽爲之嗣穎異善讀書早歲有聲於庠以恩貢例
應司鐸卽余執友是年春欲述公之德行政事碣於墓屬
余握管余不獲辭謹就夙所見聞摭實以爲之敘

揀選知縣舉人黃山范公墓誌

士之能垂休光照後世者莫不由詣造精純之儒爲之啟
焉士之能顯文章名當世者亦莫不由蘊蓄道德之師爲
之教焉莫爲之啟雖美弗彰莫爲之教有才難成而所謂
繼往開來雅範文教斯世原未易極見也吾於黃山夫子
有深慨焉夫子諱素琴字慶堂號黃山清邑望族也幼勤
學長尤嗜讀初從焦耀翁先生游遂乃童試冠軍蜚聲庠
序洎求舉業學益精進棗強雲儀先生頗器重之嘗謂文
有融洽氣象深醅密非素有涵養不能及也道光乙未
舉於鄉揀選縣令不樂仕宦退而授徒其善誘之循循雅

誨之諳諳教學以外將不知有他焉從學之士前後百餘人皆因材施教莫不得當故邇來之登科相繼甲第不絕者吾夫子實有以振之然年力漸衰精神非復昔矣猶復爨爨後學課讀子孫以延斯文之緒非詣造精純蘊蓄道德其孰能與於此詎意庚午冬忽歌頹萎竟已捐館凡屬及門倍增悽愴勒石書名用代築場藩嘗受提命之教叨居弟子之班德容宛在叩墓悲慟因不自揣謏陋敢竊效端木子之歌以誄吾師曰西齋其頹乎則吾將安放而文其傾乎則吾將安依雅範其杳乎則吾將安放歌畢乃揮涕秉筆而謹述以文光緒己酉科舉人授安徽旌德縣知

縣門生郭兆藩拜撰

例授修職郎廣憲莊公墓誌

南邑張鳳翥舉人

咸豐甲寅余主講甘陵經正書院門下士有莊生貞甫者
恂謹靜雅爲文有才思而不越乎法度心竊異之謂非素
有庭訓者無以臻此及與其令祖廣憲公游乃始信淵源
之有自也公素甘澹泊不慕青紫入泮後卽絕意仕進家
居事親孝愉色婉容靡間斯夕切本源思嘗恭修家乘以
敘世系期敦宗也其弟賈木公偕厥配相繼沒遺孤載福
公甫周歲公教養兼施遂登邑庠厥後載福公又故子亦
幼尤賴撫入成均訓子姪羣孫以義方芹水聯芬蔚然詩
禮門第更難得者七世同居閨門和睦爲晚近所罕聞處

鄉時宣讀

諭廣訓以勵善行老憊貧疾者彌加周恤邑人翕然頌爲長者邑侯劉公宣化茲土值運河橫決不忍禾苗滄沒知利物濟衆惟公克任求爲佐理以挽狂瀾嗣是定之曹公宰斯邑首重學校覩書院遺址延紳耆謀修葺公身倡義舉鳩工庀材數月而工竣並邀同人協力捐輸爲延主講給獎賞資迄今文風日上科第蟬聯皆公力也若倡修文廟文昌閣東橋善行尤爲指不勝屈諸君子景慕遺徽莫罄銘徧欲託諸記述勒之貞珉傳之後世以垂無窮乞序於余余曰公積德累仁善遺孫謀將克昌厥後光大門閭豈

待以言傳哉而其懿行卓卓又何可以不傳也謹就夙所
見聞摭實以爲之序



--	--	--	--

誥授奉政大夫舉人郭公墓誌

清籬夫子余受業師也

諱

兆藩

字

价維清籬其號太老夫

子生久公長子也幼聰穎性篤厚總角受書卽務心得故
年未冠已補弟子員同學器重之皆卜其遠到公入泮時
振聲公六老師尙幼經歷家務惟太老夫子身任其事不
肯分勞於公蓋誠望公之大有爲而不欲其小就也但家
少蓄積艱於供給姑借蒙館教讀以圖上進雖坎珂屢遭
而精勤益奮公之嗜學不厭亦可謂善體親心矣清邑自
國初以來縉紳先生漸見凋謝文風不振非伊朝夕公仰承
義方不自菲薄視弟子如嚴師以講畫爲誦習研史窮經

晦明不倦較從師肄業涉獵爲更富焉其爲文則法密理
精言皆有物而詩賦之摘藻揚葩尤獨出冠時蓋不僅爲
一邑之望亦一郡之傑也道光己酉蒙選拔遂聯捷舉於
鄉從學者濟濟日盛蓋公之教人無貧富賢愚因材而施
故藝苑蜚聲者多出其門非循循善誘其孰能與於斯咸
豐辛酉歲逆匪讜起劫掠山東冠縣一帶幾徧畿南公不
忍坐視加意團防調度有方三十六團之中得公之力居
多邑侯張公嘉其功據實上聞奉

旨加知州銜特授安徽旌德縣知縣昔太老夫子望公之大
有爲亦可於斯小試云惜乎鶴算不永於同治十年二月

間捐館舍時年五十有五生等親炙久追溯芳徽流連不
置爰據見聞釀金勒石以垂不朽咸豐辛酉科舉人受業
門生劉步嶺頓首拜撰

歲貢生鴻臚寺序班楊公墓誌

楊秉德

蓋聞不朽有三次重立功自各省舉辦團練衛身家防賊
匪厥功甚偉洵要務也但奉行日久弊難枚舉余下車以
來訪有知方團團總楊公

諱翊字

藻馨歲貢生系屬同宗

素推望族咸豐辛酉土匪倡亂築寨操練每置告警晝夜
巡守不論貧富咸同食息旗幟槍炮各守汛地隨團數村
皆聽公之調度如身使臂臂使指非公正廉明足以服人
其孰能與於斯余隨辦軍需歷有年所紀功數次始蒙

上賞然整軍以法余處其易御眾以情公處其難蓋勢既不同

處置亦異而守寨之法公尤扼其要焉一曰養眾生烽煙

告警按戶口以分粟米而村無飢人一日困人心家甯戶
曉集丁壯而明大義而人知保聚其恩義所感固皆安堵
無恐矣迄今託庇宇下與家生全恩同再造者已二十餘
年藉藉者猶稱道弗衰猗歟休哉厥功不甚偉哉令嗣增
貢生豁然公同鄉人來署細述顛末乞序於余余義無容
辭爰就採訪摭實以爲序云

例授武信驍尉武舉孫苾郭公墓表

南邑

張鳳翥

舉人

古者天子將祭必先習射於澤宮所以選士也所以選士之內志正外體直發而不失正鵠者而升庸之也故國家選舉之法惟以射取士爲最古而後世能本此意以教人者往往難之郭公採芹甘陵人傑也少儻有大志善談論喜交游座上之客常滿每決一事發一議四筵皆驚大名觀察李公嘗過其廬一見傾心爲榜其門曰國士無雙其爲人概可想見也公寡兄弟不能久事筆研投筆而習弓馬以挽強破的之長入爲黉宮上選於道光己酉科登賢書由是聲稱藉甚一時豪俊之士縉紳之家爭欲締交

其門因多疾未獲舉進士第壯志莫酬遂拓射圃而設武
帳焉其講授之精密生徒之衆多爲畿南數郡最教澤由
直隸迄山東臨清雅歌投壺之士一經指示率皆取科名
以去門下士游膠庠者數十人捷京兆者十數人而清源
徐朝幹以花翎侍衛仕至副總戎本邑張體乾以藍翎侍
衛仕至遊擊皆公力也咸豐十一年冬舊疾復作於同治
元年正月捐館舍享年六十有五其門人思慕之而不能
忘丐余爲敘因醵金勒石以垂不朽

鯨隄

宋
司馬光

東郡鯨隄古向來
煙火疏提封百里遠
生齒萬家餘賢守
車纜下疲人意已紓
行聞歌五袴京廩滿郊墟

永濟道中

王安石

燈火匆匆出館陶
回看永濟日初高
已聞空舍烏烏樂
更覺荒陂人馬勞
客路光陰真棄置
春風邊塞祇蕭騷
辛夷花下鳧塘尾
握手何時敘汝曹

永濟渠

明
張鶚

一脈南來發衛泉
漫邀汶水共朝天
誰知千古隋煬帝
爲我皇朝濬巨川

蓮花池

管昌

一帶高塚御河濱故老相傳耿貴人千載淑魂應有意月
明處處現前身

蓮花池

向日紅

颯颯西風草木黃貴人曾此瘞羅裳只今花貌芙蓉出猶
帶宮娃一段香

廉頗墓

向日紅

趙王臺榭綠蕪生千古松楸故國情不是將軍能肉袒幾
多荒塚不知名

玉皇閣

向日紅

峻嶒樓閣御河濱
眺遠憑高發興新
去去煙帆迷海市
飛雲鳥度江濬孤
尊日暮思鄉客
雙鳥天涯薄宦人
猶有丹心趨曉漏
豈應青髮老風塵

塚址

鄧城南二十里土山
時桃李開放無際

盧士傑

世情悲宦海
往往厭羈束
不受吏塵緇
俯仰從心欲
瞻茲百里封
澹泊資微祿
心閒簿領先
析楊卧苔綠
庭空午訟聲
一編常寓目
奄忽屆青陽
春盤餼苜蓿
東作時方農
枝頭催布穀
省耕出郭門
齋馬信篤速
徜徉阡陌間
花光肆繁縟
紅白間青黃
輕煙澹朝旭
隨意藉芳草
布幄圍煙縠
願盼錦城中
達觀陋金谷
緬懷古人風
高曠各有屬
穠豔

河陽桃蕭疏彭澤菊自昔皆云然於我何不足以茲成勝
游樂事猶堪續安得長爲春高歌醉醺醺

山陰

宋祖昱

西洲

清河覽古

此地清河國千秋感廢興秦封荒鹿郡漢隄闕魚燈黨藉
遺風改戎麾浩劫乘何人裁後序猶爲賦甘陵

清河道中弔陵內史

宋祖昱

丙史東吳彥清河緬舊蹤徒聞思唳鶴無復羨雲龍兄弟
遭讒搆文章誤折衝司空泉壤下相見肯從容

廉將軍祠

宋祖昱

欲識將軍貌荒祠到幾回邯鄲春草合鉅鹿夕陽催棄置

緣秦間功名誤郭開至今蘋藻薦猶用趙人來

廉將軍墓

宋祖昱

俯仰千秋後襟期尙可論負荆能折節健飯擬酬恩弓劍
藏邱壑風雲起墓門一抔荒土在長此弔眞魂

李雲墓

宋祖昱

孤鳳鳴何急徒聞異代思可憐白馬令不到濯龍池名在
留遺表墳荒沒舊碑君恩容折檻翻意漢成時

鯨隄

宋祖昱

冀野千年後鯨隄一道通波濤喧白馬陂障憶黃熊姓氏
在堯典山河待禹功懷襄今已息百谷自流東

登清河古城

宋祖昱

欹斜雉堞暮雲升，步屨攀躋僅百層。
夕照自開秦鉅鹿，春風不度漢甘陵。
山川戰後銷金鏃，隧道荒時見漆燈。
獨有城烏棲復起，白頭相對怨難勝。

永濟渠晚眺

宋祖昱

參差官柳亂啼鴉，永濟河渠一道斜。
流水暮雲空漢國，大隄春草自隋家。
何人擬擊中原楫，此處堪浮博望槎。
錦纜牙檣行近遠，遙看直非是京華。

英陵

宋祖昱

突兀荒陵倚素空，龍樓鳳閣杳難通。
美人憔悴深宮外，玉

子歸來故園中春草秦關千里碧夕陽漢苑片時紅東京
梁竇俱消歇榛芥蕭蕭起朔風

貝州

宋祖昱

宣撫南來有運籌一時叛空檣車收只今趙宋關河外
草寒煙古貝州

茶店

宋祖昱

茶香出盞露華溥長與君王奉笑歡自是官家遵祖制一
時爭貢卜龍團

古黃河

宋祖昱

平沙漫漫繞城多恰似西來卷白波瓠子桃花今不見春

風空渡古黃河

龍爪槐

宋祖昱

宋祖微行此舊蹤只疑根幹有雲從至今爪甲差相似枝
上曾經曝袞龍

蔡河

宋祖昱

陌上相逢怨已深蔡河終古碧沈沈黃金未許通君意白
水翻能盪女心

甘陵

宋祖昱

悵望甘陵日欲昏貴人埋玉此長存西風驟雨槐花落翁
仲無聲立墓門

鄰邑驅蝗入界至縣境防視賦示僚屬

會稽

錢啓文

益洋

清河雖彈丸夙昔稱樂土非獨水泉甘亦且民俗古我來
蒞茲土差喜獲安處蝗飛自何方颯颯若風雨仰視天漢
間不見日亭午乃由鄰封處積久未採取羽翼既長成騫
騰聚儔伍令君極仁慈愛蝗不忍捕驅之東南行出境免
勞苦私幸脫罪愆詎惜傷禾黍吾民亦何辜邁閱遭外侮
詩人惡食苗於焉賦碩鼠

蝗去縣境重賦示僚屬

錢啓文

天災有流行捕救詎無策既藉先幾謀亦在將事力忍令
羽蟲孽乃作鄰境賊飛蝗西北來連翩杳何極聞聲若風

行觀景儼雲黑方遺吾民憂其害懼已棘誰謂指顧頃俄
起歸飛翼禾黍仍油油根苗未殘食輿臺滅殺機黎甦轉
欣色豈其戀土懷勉示矜廉德物情詎有知天意固不測
悔禍因人心曷各懋厥職

題李行祖祠

錢啓文

三百六旬期已徧赤精漸滅黃精見豔妻一煽四侯封財
賄公行官位亂臣心點點比干血正氣森然語激烈有如
積潦苦陰霾警靈一聲萬怪滅帝欲不諦顙有泚責難不
受翻切齒濯龍池畔龍何癡身腐獄中香滿尸敢殺諫臣
國必覆朝右忠良同一哭指日青蛇御座飛表墓人來淚

簌簌吁嗟乎人人心有是非真管蠶一語天爲春我心願
化華表鳳向日高鳴達

紫宸

弔葛烈女

邑人楊一峯舉人

愁雲黯澹水鳴咽子規夜啼眼滴血葛氏有女賢且貞落
落人寔表奇節辛酉流寇起直東豕突狼奔競傳說烽煙
逼近無奈何母女逃出且手挈跟隨何處堪深藏幸有瓜
棚菜園設一騎紅塵突如來忽見嬋娟背欲裂其母長跼
苦哀求賊匪劍光如電掣拔劍揮處母身傷女猶抱母泣
永訣賊攜同上噴五醜怒氣填胸置不絕席卷石轉心難

回之死靡他計早決從容就義非所知爭奈清操堅似鐵
賊怒鞭箠無完膚殘喘苟延終不屑途經井畔玉驄嘶貞
心獨赴泉冽視死如歸世罕聞皎若白璧無虧缺勿謂
巾幗殊丈夫何非忠義氣所結忠則盡命心無回義則捐
軀志不折我聞此事益慘悽拈毫縷述慚詞拙何幸召杜
涖此邦恨銜地下冤始雪名表節孝位列祠九原夙忿一
朝洩嗚呼井有時枯泉時竭獨此勁節與堅光俎豆千秋
永不滅